

DISPLEGADENN (Récitation)

ALANIG AL LOUARN

An heol melen	'Vel eul lapous,
Dreg ar mene	'Vel an diaouled,
A strink, laouen,	Al loenig rouz
Trezek an Ne.	A red, a red !

Kleo, chasee !	Bec'h d'Alanig,
Ar c'horn sklintin	Tan d'ar peilhaer !
Penn-da-benn kêr	Bec'h d'Alanig
A son lirin...	Tan d'ar muntre !

Ar c'hlizenn drant	'Dreuz ar girzier,
He deuz skuilhet	'Dreuz al lannou,
Boulou arc'hant	Alanig laer
War an havreg.	A glask troiou...

Sao, goustadig,	E jilpadenn
Eus da wele ;	Stank ha raouliet,
Lez gant Mammig	'Hed an draonienn
Ar vugale !	A gorn bepred...

Prim war da skoa	Dao ! Dao ! daou denn !
Da fuzuilh vat.	O reuz garo !
War-raok breman	War an dachenn
War-du ar c'hoad !	E ruilh maro !

Fri-Du, Lost-Gwenn !	Ar chas, kerkent,
Gwaskomp, paotred !	Peurgounnaret,
Alan beg lemm	A-daoliou dent
A dec'h d'ar red !	'Deus hen brevet !

Hervez Pr. PROUX.

SON AN TACHER

Er vourc'h abaoe ma choman,
Morzol an tacher a glevan.

'Hed an deiz, 'hed an noz e sko !
Skei a ra e vorzol atao !

Sellit e zivrec'h noaz ha du
O tistrei an houarn a bep tu.

An heol kaer morse ne wel
Bepred glaou ha tan ruz ar c'hoell.

Da vaga e vugale gaez,
Kant ha kant tach a ra bemdez.

Re all a ya d'ar pardonious,
Hen a chom da ober tachou.

Tachouigou, tachou pennek,
Hag a houarn evit eur gwenneg !

'Hed an deiz, 'hed an noz e sko !
Skei a ra e vorzol atao !

A. BRIZEUG.

LA PAGE DU FOLKLORE

MIZ GENVER

Avel ar c'hreisteiz
A zegas e-leiz.

Kanevedenn eus an noz,
Glao hag avel da hanternoz.

Reo gwenn er c'hresk,
Amzer gaer ha fresk.
Reo gwenn en diskar,
Amzer c'hleb hep mar.

Gwell eo gwellout ki e kounnar
Eget heol tomm e miz genvar.

MIZ C'HOUEVRER

Miz c'houevrer a c'houez, a c'houez,
Hag a laz ar voualc'h war he neiz.

Gant dilhad tomm ha bevans mat
Pep miz goanv a zo dereat.

Da ouel Matiaz
E choaz ar big he flas.

Dastumet gant A. BRIZEUG.

An tri bemoc'hig bihan

Piou en deus aon rak ar bleiz drouk, ar bleiz du, ar bleiz drouk,
Piou en deus aon rak ar bleiz drouk, pa deu war hor choug ?

Bez 'oa tri borc'hellig drant,
Tri bemoc'hig bihan koant,
Ha pa sponte darn o klevet ar bleiz,
Int a c'hoarze goap e-leiz...
 'N hini genta sart e benn
 Laouen 'savas eun ti foenn ;
 Hen a rae « Fut, fut ! »
 'N eur c'hempenn e glud :
 N'en doa ket eul labour tenn !...

An eil, pebez souez,
A savas ti gant gwialennou gwez :
« Toc'h, toc'h, toc'h, toc'h, toc'h »
A rae ouz ar wiz hag an hoc'h...
 Hag an trede porc'hell gaez,
 Evit beva en e aez.
 A savas ti, plas ennan da dri,
 E mein kalet hag e pri...
« Toc'h, toc'h, toc'h, toc'h, eme an daou all,
« Deus aman 'ta bleiz fall ! »

Piou en deus aon rak ar bleiz drouk, ar bleiz du, ar bleiz drouk,
Piou en deus aon rak ar bleiz drouk, pa deu war hor choug ?

Neuze 'maez eus Koad-an-Noz,
E teu Gwilhou ar bleiz koz.
« Rou, rou, roull, roull, roull », e lamm eus e doull.
An ti-foenn 'gouez en e boull !...
 An ti gwial 'chome c'hoaz,
 Ennan 'n eil pemoc'hig noaz.
 « Badadaou, daou, daou ! an eil a ra daou ! »
 Ha diskaret an ti glas !
An tredeig kaez
A lar d'ar bleiz : « Te 'ranko chom er-maez ! »
Hag ouz mein an ti
Ar bleiz a frikas beg e fri...
 Bremen e klask ar bleiz du
 Mont e-barz e tu pe du.
 'N em sila 'ra er siminal vras :
 Eno e voe rostet poaz !
« A ! a ! a ! a ! biskoaz kement-all !
« 'Man devet ar bleiz fall ! »